

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 096427 23 KK
Visoko, 29.08.2023. godine

U IME FEDERACIJE BOSNE I HERCEGOVINE

Općinski sud u Visokom, po sudiji A. A. uz sudjelovanje zapisničara S. Dž., u krivičnom predmetu protiv optuženog B.M.a , zbog krivičnog djela Nasilje u porodici iz člana 222. stav 2. u vezi sa stavom 1. KZ F BiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj ... od 14.02.2023.godine, nakon zaključenog glavnog javnog pretresa, održanog dana 29.08.2023. godine u prisustvu Kantonalnog tužitelja E. Ć., optuženog B. M. i branitelja L. T. advokat iz V., na pretresu za objavljivanje presude, dana 29.08.2023. godine, donio je i javno objavio :

P R E S U D U

OPTUŽENI: B.M., sin H. i majke H.1 rođene K., rođen ... godine u mjestu S., općina V., gdje je i nastanjen na adresi ..., općina V., pismen, sa završenom srednjom školom, po zanimanju zidar, oženjen, otac jednog djeteta, vojsku nije služio, nezaposlen Bošnjak, državljanin BiH, JMBG: ..., neosuđivan,

K R I V J E

što je,

Dana 18.12.2022. godine, oko 00,05 sati, na području općine V., u stanu u kojem stanuje u zajedničkom domaćinstvu sa suprugom B.N. koji se nalazi na adresi ..., nakon što se doveo u alkoholisano stanje, vršio fizičko i psihičko nasilje prema svojoj supruzi N. na način da je istu fizički napao, tako što je rukama uhvatio oko vrata pokidavši joj srebrni lančić, vrijeđajući je i govoreći da je kurva, te joj psovao majku, a kada se oštećena uspjela nekako odvojiti od njega, uz prijetnju fizičkim napadom je istjerao iz stana, a potom počeo izbacivati njene stvari na hodnik, svjestan da ovakvim drskim i bezobzirnim ponašanjem i nasiljem ugrožava mir, tjelesnu cjelovitost i psihičko zdravlje člana porodice s kojim živi u zajedničkom domaćinstvu, što je i htio, što je kod oštećene izazvalo određenu dozu straha i uznemirenosti,

dakle, drskim i bezobzirnim ponašanjem ugrozio mir, tjelesnu cjelovitost i psihičko zdravlje člana porodice s kojim živi u zajedničkom domaćinstvu,

čime je počinio krivično djelo Nasilje u porodici iz člana 222. stav 2. u vezi sa stavom 1. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, *i z r i č e*

U S L O V N U O S U D U

Kojom se optuženom za počinjeno krivično djelo utvrđuje kazna zatvora u trajanju od 4(četiri)mjeseca , a koja se neće izvršiti ako optuženi za vrijeme od 2(dvije)godine godine ne počini novo krivično djelo.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret sredstava suda.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj ... od 14.02.2023.godine , optužilo je B.M.a , zbog krivičnog djela i to : Nasilje u porodici iz člana 222. stav 2. u vezi sa stavom 1. KZ F BiH,(Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH)

Optužnica je potvrđena od strane sudije za prethodno saslušanje ovog suda dana: 03.03.2023.godine. Dana 15.05.2023. godine na ročištu o izjašnjenju o krivnji, optuženi B.M. je izjavio da nije kriv za krivična djela koja mu se stavljaju na teret.

Na glavnom pretresu održanom 29.08.2023. godine, prije izvođenja dokaza, optuženi B.M. priznao je krivnju za krivično djelo koja mu se stavlja na teret i to Nasilje u porodici iz člana 222. stav 2. u vezi sa stavom 1. KZ F BiH, a njegovo priznanje je prema ocjeni ovog suda u saglasnosti sa dokazima u koje je sud izvršio uvid i to: zapisnik o saslušanju svjedoka oštećena B.N., kći B. iz V., ..., B. A., kći Š. iz V., ..., D. A., sin M. iz V., ... bb, OSL PS V., H. H., sin Ć., ulica ..., N. S., OSL PS V., Službena zabilješka PS V. broj ... od 18.12.2022. godine; Alkotest printer na ime B.M. broj mjerenja ... od 18.12.2022. godine; Izvod iz kaznene evidencije za optuženog B.M.a PS V. od 20.12.2022. godine.

Branitelj optuženog u uvodnoj riječi je izjavio , da optuženi ovom prilikom mijenja svoju raniju izjavu te se izjašnjava da je kriv za krivično djelo koje mu se predmetnom optužnicom stavlja na teret. Optuženi moli sud da prilikom izricanja sankcije u vidu ima olakšavajuće okolnosti koje su navedene u samoj optužnici to je da je lošeg imovnog stanja, nezaposlen kao i činjenicu da nije ranije osuđivan. Posebno napominjem sudu da je zbog ovog događaja i sam optuženi bio bolnički liječen, tj. završio je na odjelu psihijatrije ... jer je pokušao izvršiti suicid. Događaj mu je teško pao, a priznao je izvršenje krivičnog djela, čime je i smanjio troškove postupka, pa predlažem sudu da sve to ima u vidu prilikom izricanja sankcije.

Optuženi je u svom iskazu prilikom priznanja krivnje izjavio da mijenja izjavu o krivnji, i da se danas na glavnom pretresu izjašnjava da je kriv, kaje se za učinjeno i izjavljuje da trpi ovo stanje već 20 godina.

Sud je ovo priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u saglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je optuženi ostvario sva bitna obilježja bića krivičnog djela koje mu se stavljaju na teret, odnosno : krivično djelo Nasilje u porodici iz člana 222. stav 2. u vezi sa stavom 1. KZ F BiH.

Po ocjeni suda optuženi je navedeno predmetno krivično djelo učinio direktnim umišljajem jer je bio svjestan svog djela i htio je njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predloženim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela Nasilje u porodici iz člana 222. stav 2. u vezi sa stavom 1. KZ F BiH.

Prilikom izricanja krivično pravne sankcije sud je cijenio optuženom B.M. kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćanju krivičnog postupka, kao i okolnosti koje je optuženi naveo u svom iskazu prilikom priznanja krivnje, te činjenicu da optuženi do sada nije ranije osuđivan. Dok otežavajućih okolnosti sud nije našao. Cijeneći utvrđene okolnosti na strani optuženog, sud je optuženom B.M.u , za navedeno krivično djelo utvrdio kaznu zatvora u trajanju od 4 (četiri) mjeseca, koja kazna se neće izvršiti ako optuženi u roku od 2(dvije)godine ne počini novo krivično djelo. Po mišljenju ovog suda izrečena sankcija srazmjerna je stepenu odgovornosti optuženog i težini počinjenih krivičnih djela koja mu se stavljaju na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret budžetskih sredstava suda.

Oštećena nije postavila imovinskopravni zahtjev.

Sudija

A. A.

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.